

(3)

**EXCERPTA QUÆDAM**  
**EX LIBRO**  
**CARDINALIS GABRIELIS PALEOTI**  
**ARCHIEPISCOPI BONONIENSIS**

*De Consultationibus Cardinalium*

*QUÆ PRÆMITTUNTUR*

Editioni ejusdem Operis Brixianis typis adornandæ  
juxta exemplar editum a Typographia  
Apostolica Vaticana an. 1592.



*Nulla remedia , quæ vulneribus adbibentur , tam faciunt  
dolorem , quam quæ sunt salutaria.*

Cicero in Epist. ad Octav.

( III. )  
EX LIBRO  
CARDINALIS GABRIELIS PALEOTI  
DE CONSULTATIONIBUS CARDINALIUM  
Impresso in Typographia Apostolica Vaticana  
ANNO MLXXXII.

---

PARS I. QUÆSTIO VI.

*An Cardinales, etiam non requisiti, teneantur ex natura officii sui, ubi res postulat Papæ consilia subministrare.*

**Q**UOD a nobis supra conclusum fuit, Cardinales duplici jure, tum charitatis, tum justitiæ astringi ad consilia sua proferenda, intelligendum est, quando a Papa sententiam rogantur. At, Papa nihil petente, dubitatio major videtur, an, si ipsi nihilominus rem Ecclesiæ indigere putant, debeant ultro se inferre, ut publicis necessitatibus, consilio, operaque sua, quantum in eis est, subveniant.

Dubium enim id primum facere videtur, quod dici solet, neminem ad consilium nisi vocatum accedere debere &c.

Verum si exacte res expendatur, verius fortasse illud invenietur, ut etiam non requisiti teneantur ea, quæ necessaria bono publico judicant, ultro denunciare; siquidem non sunt ipsi ex eo Consiliariorum numero, quos solent sibi Principes arbitrio suo adsciscere, mutare, & repellere, sed sunt potius ejus ordinis Consiliarii, qui vel innati Principi ipsi dicuntur, vel munus hoc eorum dignitati annexum habent &c.

Quæ cum ita se habeant, sequi videtur, quod si, postulante necessitate, HI PAPAM ADMONERE, ET CONSILIO SUO INGENUE, ET INTREPIDE JUVARE PRÆTERMITTANT, MUNERI

SUO NEQUAQUAM SATISFACIANT, IMMO DAMNATIONIS ÆTERNÆ PÆNA TENEANTUR.

Etſi Princeps expreſſe non petit, ipſa tamen Reſpublica, quæ neceſſitate premitur, & rei evidentia ſatis interpellat, ſubſidiumque loco ipſius Principis poſtulat. Unde Cardinalis ad has publicas voces, communisque boni periculum exurgere, ſequæ excitare debet, ut imminens damnum ſuo conſilio, atque induſtria repellat.

## PARS II. QUÆSTIO VI.

*Cardinales, qui ſibi perſuaſum haberent, Papam jam in animo ſtatuiſſe quid velit facere, eumque ſententiam minime mutaturum, & ideo ſe diſſentiendo nihil proſecturos, an tacendo eſſent excuſandi.*

**I**Nter multiplices tacendi excuſationes, ulla fere frequentius ſe offerre ſolet nonnullis hac ipſa, de qua in præſenti agimus: ideo paulo diligentius hoc argumentum non hic tantum tractandum, ſed alibi etiam, pro ut occaſio ferret, aliis, atque aliis rationibus erit repetendum, ut tamquam pernicioſa quædam radix Deo adjuvante evellatur, & perſuaſio huiusmodi non ſolum inanis, ac contemnenda declaretur, ſed etiam PLENA DETRIMENTI, QUÆ OMNEM VIM CONSILII AUFERAT, PRUDENTIÆ NERVOS ELIDAT, ET CONSULTATIONIS UTILITATEM PRORSUS ABCINDAT &c.

Quod vero ſpectat ad illud, Papam ſententiam jam conceptam mutare minime ſolere; dicimus facti hanc quæſtionem eſſe, & qui ita ajunt, non videre nos, qua ratione id probare poſſint. Nos enim per annos fere triginta, quibus Conſiſtorio aſſeſſe capimus, ſedentibus octo Summis Pontificibus: PIO III. PIO V. GREGORIO XIII. SIXTO V. URBANO VII. GREGORIO XIII. INNOCENTIO IX. ac Sanctiſſi-

fimo D. N. CLEMENTE VIII. affirmare illud vere possumus, numquam factum esse, ut Papa deliberationem aliquam ab eo conceptam mutare noluerit, si major Cardinalium pars ab eo dissentiens id verbis expresserit, sed vidimus, quandocumque ille perstitit in eo, quod semel proposuit, in causa id fuisse, quod pauci reperti sint, qui diversum ab illo senserint, aut certe palam declaraverint, & multo plures, qui in illius sententiam ierint &c.

## PARS II. QUÆSTIO IX.

*Si qui suspicarentur, Papam, ipsis dissentientibus, magis obfirmandum, aut potius irritandum; an sententiam suam debeant comprimere.*

**A**D officium tenetur Consiliarius, quod in ejus est potestate: idque est fidele consilium dare: ad finem autem non adstringitur, qui est illum persuadere, quia ab eo hoc non pendet, ut alias conclusum fuit, præterquamquod Consilarii Cardinalis finis est quidem prodesse Papæ, sed ad boni publici utilitatem, & Sedis Apostolicæ dignitatem. Et ideo quamdiu interpellet hæc ratio communis boni juvandi, non debet ille a munere suo cessare, neque hunc tamquam præcipuum finem ullo pacto deferere.

De ipsis Consiliariis alias diximus non debere eos, quamvis etiam discrimina illis imminerent, officium suum intervertere, CUM PURPURAM SUSCIPIENTES HOC SE FIDEI, AC JURAMENTI VINCULO OBSTRINXERINT, UT PRO VERITATE, JUSTITIA, PUBLICAQUE UTILITATE TUENDA, NEC SANGUINIS EFFUSIONEM VEREANTUR.

Et sane eo frequentioribus votis hic spiritus fortitudinis a Deo implorandus est, quo magis illum in Ecclesia Dei necessarium esse hodie cognoscimus.

Cum Papa caput sit, & administrator totius Ecclesiæ, cur credamus eventurum, ut ille debeat irritari in earum rerum perniciem, quæ ad illius commodum, dignitatem, ac patrocinium pertinent? HOC CERTE, QUOD NEC DE BARBARO, AUT SÆVISSIMO HOMINE SUSPICANDUM ESSET, ABSIT UT DE EO, QUI PATER, ET PASTOR EST, CONCIPERE VELIMUS, ubi præsertim naturalis ratio, ac sui ipsius amoris affectus repugnare vehementer solet &c.

Verum quoniam magna hinc deferendi officii occasio suboriri posset, sæpeque inanes sunt hæ suspiciones, ac potius humanæ imbecillitatis commenta: ideo censeremus nos, nisi perspicua admodum, & fere indubitata hæc futura se perniciēs ostenderet (QUOD VIX UMQUAM EVENIRE POSSE CREDENDUM EST) bonum Consiliarium a recta muneris sui ratione, tamquam a regia justitiæ via numquam discedere debere. Et quamvis quædam ab Ethnicis Auctoribus commemorentur, quorum exempla ad excusationem facere videntur, dum ajunt: *Vidimus curiam trepidam, & elinguem, in qua dicere quod velles, periculosum: quod nolles, miserum esset*; nos tamen, qui nihil, nisi culpam, & peccatum horremus, longe aliam vitæ rationem profitemur: & QUIDQUID ACCIDAT, PRÆ HONESTATIS STUDIO, AC JUSTO SUSCEPTI OFFICII MUNERE CONTEMNERE PARATI ESSE DEBEMUS.

#### PARS II. QUÆST. X.

*An Principis scientia, & patientia, Cardinales animo dissidentes, sed silentio & capitis demissione se assentiri ostendentes, excusare censeantur.*

POSSet fortasse Thema propositum legentibus admirationem movere, quod dubitare videamur accidere posse, ut Princeps prudens, & sciens, patiatur Senatores suos

suos coram se in throno Majestatis Sux sedente , aliud intrinsecus sentire, aliud extrinsecus præferre, & tanquam in scena delectetur sibi ab illis Consilarii personam induentibus, veluti histrionibus illudi, qui nihil minus, quam vera consilia proferant. Est ita sane, nosque idem confitemur. Sed quoniam progredientibus temporibus, possent nonnulli fortasse interdum existere, qui suspicarentur in magno Senatorum numero non deesse, qui tuta conscientia silentium amplectarentur, eo quod Principem hæc omnia dissimulasse sibi persuaderent; idcirco huic cuicumque opinioni obviam eundum esse existimavimus, ut si credulitatem hanc licet inanem nolint eo etiam tempore deponere, saltem intelligant eam Cardinalibus nequaquam ad excusationem apud æterna tribunalia profuturam esse &c.

Ut ait S. Augustinus, *nemo mentiens in eo quod mentitur, servat fidem; nam hoc utique vult, ut cui mentitur, fidem sibi habeat, quam tamen ei mentiendo non servat; omnis autem fidei violator iniquus est.* Hinc sequitur, Cardinalem, qui Consilarii officium cum juramento suscipit, ut sincere, & fideliter quod sentit, denunciaret, si secus faciat, tum officium, & conscientiam violare, tum Deo ipsi, cui se juramento obstrinxit, criminis reum se constituere; immo neque accedente etiam ulla consuetudine id ei licere: quoniam CUM A DIVINO PENDEAT PRÆCEPTO, ut nemo alteri mentiarur, non potest id per consuetudinem, quæ a voluntate hominis proficiscitur, abrogari, dicente Isidoro: *Ufus auctoritati cedat: pravum usum lex, & ratio vincat &c.*

Amplius etiam, cum ad id munus consulendi Cardinalis delectus fuerit, ut non solum Principis Consiliarius foret, sed præterea ut universæ Christianæ Reip. ac Sedis Apostolicæ perpetuus administer esset: certe quamvis hic Consiliarius forte argui non posset reus injuriæ factæ Principi scienti,

ti, & volenti; illam tamen inferret Ecclesiæ Dei, cujus causam defereret; inferret cæteris Consiliariis, quibus tacendo, & annuendo persuaderet, quantum in se esset, ut idem quoque ipsi facerent, & probarent, quod omnino reprobandum esse animo judicarent; inferret denique, quod caput est, Deo ipsi æterno Judici, qui ad Cardinalatus officium illum vocavit, ut veritatem, & fidem in consulendo præstaret, quique adeo odit homines mentientes, ut Propheta dixerit: *Perdes omnes, qui loquuntur mendacium &c.*

Si objiceretur, Consiliarios deligi a Principe, idcirco ejus voluntatem sequi debere: & cum scienti & volenti nulla fiat injuria; propterea cum Princeps sciat, & patiatur, Cardinalem intus in animo dissentire, quamvis contraria foris innuere videatur, ideo nullam hoc casu ab ipso Cardinali injustitiam admitti, & proinde nullam contrahi ab eodem culpam; Respondetur, quod, etsi Consiliarium esse pendeat ab electione Principis, veritas tamen, & fidelitas in officio gerendo est jussa, & præcepta a Deo: & ideo potuit quidem Princeps non eligere talem Consiliarium, sed ubi illum sibi ad hoc munus adscivit, non potest consiliarius adversus divinæ legis præceptum mendacia consiliis miscere &c.

Quod legis obligatio a Principis voluntate oriatur, & consuetudo legi contraria, interveniente Principis consensu, excuset a culpa, & quod denique ipsa Principis voluntas instar legis habeatur, & alia hujusmodi, possunt quidem in legibus humanis valere, non tamen in divinis: de quarum numero est, non mentiri: satis enim superque dictum jam est, obligari Cardinales ad veritatem in consiliis tuendam, TUM JURE PONTIFICIO, TUM DIVINO: contra quod nec consuetudo, nec Principis scientia, aut taciturnitas quidquam operatur.

PARS



## PARS III. QUÆST. VI.

*Quid, si, tacentibus aliis, vereretur aliquis adversando singularis haberi, an tunc alios sequendo esset excusandus.*

CUM nemini liceat umquam fraudare conscientiam suam, quamvis etiam erronea esset, antequam tamen eam erroneam esse dignoscat, ut alias diximus, non potest hic, aut pudoris, aut verecundiæ nomine, sive humilis officii, aut debiti erga majores obsequii, aut amoliendæ a se suspitionis arrogantia specie, aut ex quacunque alia adventitia causa, muneris sui normam interiorem deferere, memor divinæ illius sententiæ, qua scriptum est: *Attende tibi &c.*

Consiliarius, qui timet Deum, atque in officii sui obligationem oculos dirigit, SENTIET EO MAGIS TUNC URGERI SE AD DICENDUM, CUM VIDERIT CETEROS ASSENTIRI, nam tunc tempus ipsum declarat, extremam veluti necessitatem imminere aliter consulendi, eo quod bonum publicum tunc in majori periculo versatur.

Si de præmio terreno dando ageretur, nemo sane vereretur singularis haberi, immo appeteret alios anteire, ut palmam obtineret: quanto ergo magis &c.

Sed quando etiam temere alii de eo aliquid vellent judicare, ILLE SIBI INTEGRITATIS SUÆ, AC VERITATIS CONSCIUS FACILE INANES ALIORUM VOCES, AC SI DE EO IN INSULIS, AUT EXTREMIS REGIONIBUS LOQUERENTUR, contemnet, quippe qui agnosceret se Dei causam, cui rationem redditurus est, agere.

## PARS V. QUÆST. I.

*An Cardinali sit necessaria in Consistorio libertas loquendi; an potius, si aliquando ea non utatur, sit excusandus.*

QUONIAM tractatio nostra eo maxime spectat, ut intelligant Consilarii, hoc proprium eorum munus esse,  
ut

ut sincere , & libere quod sentiunt , loquantur ; ideo paulo diligentius præsentis Thematis occasione , de hac libertate loquendi differendum putavimus . Nam cum late hoc nomen pateat , nollemus , quemquam hujus vocis acceptione decipi , ignorataque propria illius vi , in alios , atque alios errores labi &c.

In primis ergo ad libertatis hujus necessitatem ostendendam , illud in memoriam redigimus , quod etiam attigimus alibi , Cardinalium scilicet gradum ad bonum Ecclesiæ tuendum , ac promovendum institutum fuisse ; A QUO QUIDEM FINE ADIPISCENDO , CUM METUS , AMOR , ÆMULATIO , SPES , ATQUE ALIÆ PRIVATÆ CAUSÆ SOLEANT HOMINES RETARDARE , atque ad loquendum quod oportet languidiores reddere , ideo ad vitiosas hujusmodi affectiones veluti boni publici hostes superandas , certum est libertatem hanc loquendi , de qua agimus , tamquam necessarium Cardinalitii muneris exercendi instrumentum omnino requiri &c.

Consiliarius , quamvis mentis acumine plurimum valeat , si tamen hac dicendi libertate destituatur , inermis plane erit , neque ex ceteris naturæ , & prudentiæ præfidiis utilitatem ullam reportabit , nec poterit muneris sibi commissi navigium tamquam remis , & vento spoliatum in portum perducere , SIVE ID METU , SIVE PUDORE , SIVE AFFECTATA NIMIS REVERENTIA , SIVE PROPRII AMORIS INVOLUCRIS , seu quacunque alia specie id accadat ; cum libertas dicendi sit veluti nervi spiritus , & vita consilii . Quid enim prodest acute , & prudenter prospicere quid consulendum sit , si id eloqui libere non audeas ? inutile , languidum , emortuum sit necesse est , quidquid libere non enunciat . Neque hæc libertas ad audaciam , ad immodestiam , aut contentionis studium perinet , sed potius ad charitatem , ad ingenuitatem , ad bene de aliis merendi propensam voluntatem : nam QUI LIBERE  
DICIT,

DICIT , NIHIL AD SUUM COMMODUM REFERT , SED PUBLICÆ UTILITATI SERVIT . Quare & liberum , & modestum esse licet , imo modestia cum libertate conjuncta proprium est , & magnum Consiliarii ornamentum &c.

Extra Consistorium , si quando Cardinales sponte ad dandum Papæ consilium se accingant , non negamus quando id non justitiæ , sed charitatis potius vinculo fecerint , multa ab iis circumspici debere , & impedimenta , quæ supra objecta fuerunt , diligenter ab iis expendi posse , ut quamvis quod dicturi sunt , numquam a fide , & veritate sejunctum esse debeat , quod tamen ad rationem , seu modum explicandæ sententiæ suæ pertinet , non credimus eos ad summam illam libertatem retinendam cogendos esse , sed pro ut eis opportunum visum fuerit , bono eos spiritu ducente , sermonis sui vim , ac cursum prudenter moderari posse , & debere , ITA TAMEN , UT CUM REIPUBLICÆ NECESSITAS URGET , NEC PUBLICÆ , NEC PRIVATIM OFFICIO SUO DESINT .

#### PARS V. QUÆST. IV.

*Cardinales rogati sententias , si ad beneplacitum Papæ se referant , aut sententiam suam Papæ judicio submittant , an muneri suo satisfaciant .*

**I**N hac responsione , si bene expendatur , plura sæpe vitia concurrunt : deficit enim justitia , quia Consiliarius in negotio Reipublicæ utili , aut noxio , non præstat verbis quod debet : deest sæpe veritas , quia ex animo non loquitur : læditur obedientia , quia non paretur Principi , aperte consilium petenti : claudicat prudentia , qua rectæ agendi rationem non servat : charitas non colitur , quia proximus in necessitate consilii positus non juvatur ; & conscientia forte contemnitur , quæ illi aliquid longe melius , ac salubrius

brius respondendum dicat. Et amplius etiam Principes ipsi hac responsione potius offenduntur, qui petentes ab aliis consilia, cupiunt intelligere illorum sententiam, cum satis suam norint. Unde qui referunt se ad eorum beneplacitum, parum illis solent satisfacere; quod nos a SIXTO QUINTO sanctæ mem. tum in Consistorio, tum privatim in cubiculo audivimus, dum responsiones hujusmodi a Senatoribus, præsertim illis, qui præter cæteros, prudentia excellere videbantur, prolatas non leviter improbabat.

#### PARS V. QUÆST. V.

*Quid de iis sentiendum sit, qui se majori parti Collegii submitunt.*

**V**erum est, POST EXAMINATUM A TOTO COLLEGIO NEGOTIUM, AC VERITATEM, QUANTUM OPORTUIT, PERQUISITAM, MINOREM PARTEM A MAJORE TRAHİ, & quod a pluribus post collatas omnium rationes fuerit conclusum, pauciores sequi debere: attamen in ipsa veritatis, & causæ investigatione, tenetur quisque quod sibi conscientia sua dicat, libere profiteri, ut sæpius supra dictum fuit.

#### PARS V. QUÆST. VII.

*Si Pontifex, non exquisitis prius Cardinalium sententiis, aliquid sponte statuatur: aut si exquirat, & dum bi respondent, ille aliquid interloquatur, vel eis contradicat: sive si silentium indicat rebus, quæ ab ipsis non probantur; quæ sint partes Cardinalium.*

**Q**uod in prima hujus Quæstionis Parte proponitur, supervacaneum fortasse aliquibus videri poterit; nam cum in ea quærat, quæ partes sint Cardinalium, quando Papa iis inconsultis aliquid in Consistorio decernit, existimabit fortasse quispiam hoc nimis novum, & TAM-  
QUAM

QUAM A PRISCO SUMMORUM PONTIFICUM INSTITUTO PRORSUS ALIENUM, NEUTIQUE ACCIDERE POSSE. Alias enim initio hujus nostræ disputationis, cum de necessitate capiendi consilii ageremus, eamque tum privatis, tum publicis personis communem esse ostenderemus, hoc ipsum præcipue Summo Pontifici, qui Senatum habet singulari sapientia, & auctoritate præditum congruere, IDQUE EX JURIS DIVINI AUCTORITATE QUODAMMODO PROFICISCI, probavimus. Unde dubitandum nihil videtur, Sedem Apostolicam, quæ aliis omnibus bene administrandi exemplum præferre debet, numquam permissurum, ut res graves aliter quam antecedente matura Cardinalium Consultatione, decernantur &c.

Est ita sane: & si rationem ducem sequamur, perpetuum hoc, & constantissimum Sedi Apostolicæ erit futurum, numquam MEDIOCRES ETIAM CAUSAS AGGREDI, aut quidpiam, quod non prorsus leve sit, conari, nisi prius aditu patefacto, atque expurgata a Senatu suo semita, qua iter sit dirigendum &c.

Nos in præsentî difficultate veriore illam opinionem esse existimamus, quæ silentium in hoc etiam casu damnat, quandoquidem Cardinales non solum sunt Consilarii Pæpæ, sed simul etiam sunt publici boni suffragatores, & defensores. Ex quo sequitur, ut, quoties vident detrimentum aliquod publicæ rei posse irrogari, non egeant alia interpellatione, sed debeant statim jure suo illam tueri &c.

Cum eorum munus ad publicam causam juvandam, atque tuendam fuerit institutum, ubicumque eam in periculum, & discrimen vocari vident, non est, quod externam aliam vocem ulterius expectent: nam est Respublica ipsa, quæ interpellat, cujus causam nemo a se alienam existimare debet, cum universos attingat, & eos præcipue, quibus ex instructo munere publici boni cura, & defensio est nominatim commissa, sicut in publici criminis reum cujusvis est actio-

PARS

## PARS V. QUÆST. IX.

*An debeant Cardinales subscribere Bullas Summorum Pontificum, quamvis in Consistorio ab iis dissenferint, & subscriptionis quoque tempore eas vere, & ex animo non probent.*

**M**agnopere commendandi videntur, qui POST REM DIU, MULTUMQUE IN CONSISTORIO EXAMINATAM, ATQUE POST ID, QUOD IPSI SENTIRENT, LIBERE EXPLICATUM, ARGUMENTISQUE CORROBORATUM, cum tamen viderint, Summum Pontificem, qui in specula positus multo plus aliis & prospicere, & sapere censendus est, diversum ab iis sentire, ipsi ejus judicio cedendum, atque eximæ prudentiæ magis, quam erroneæ conscientiæ adhærendum putant.

## PARS V. QUÆST. X.

*Qui ex justo impedimento fuit absens, cum negotium tractaretur in Consistorio, an teneatur subscribere Bullam, cui major pars Cardinalium consensit.*

**S**IXTI V. Decreto cavetur, ut negotio a majori parte Cardinalium in Consistorio approbato, ceteri licet a Consistorio, & ab Urbe absentes fuerint, quando res gesta est, subscribere tamen teneantur, dummodo præsentis sint in Urbe, tempore, quo Bulla subscribenda erit.

Nec obstat quod in contrarium obiiciebatur, absentes scilicet non esse in subscriptione admittendos, sicuti nec ad jus suffragii admittuntur; nam respondetur, disparem valde eorum esse rationem, cum absens ideo non ferat suffragium in Consistorio, quoniam ibi res tractantur examinandæ, & excutiendæ, auditis omnium rationibus, & collatis simul, ac perpensis singulorum sententiis, & fundamentis, sicut alias quadam similitudine de Divino officio

a Canonicis in Choro recitando diximus: sed absens, si ferat suffragium, illud feret, ut segregatus ab aliis, & modo quodam secreto. Idcircoque absenti merito interdicitur jus suffragandi in Consistorio, quia cum sit absens, non dat consilium tamquam membrum Consistorii. At vero subscribens, quia approbat id, quod ab aliis in Consistorio fuit consultatum, & receptum, atque hæret majori parti Cardinalium tamquam pars illius Collegii, agitque & operatur, eo tempore magis induens voluntatem communem, quam propriam sequens, quod ante faciebat: propterea licet alias fuerit absens, si tamen subscriptionis tempore est præsens, potest, & debet subscribere.

Quod si major pars ab eo, quod in Bulla proponitur, dissentire inveniat, nec propria ipsius Cardinalis possit sententia obtinere, tunc in superiori quæstione jam diximus id, quod Papa statuit, & decernit, Cardinalis subscriptione in signum ministerii, & submissionis roborandum esse: non enim præsumimus subscriptionem illius rei peti, quæ evidenter, ac intrinsecus sit mala. Cui addimus, quod cum fugiendus sit perplexitatis status, ideo Cardinalis deponere debet conscientiam in subscribendo ut subditus, quam non potuit deponere in consulendo, pro ut Consiliarius.



( XVI. )

## A P P E N D I X

E X T R A C T A T U

HIERONYMI PLATI SOCIET. JESU

*De Cardinalis Dignitate, & Officio*

EDITO ROMÆ AN. MDCCXLV

C A P. XXVIII

**C**oncludimus, quamquam ille effectus, de quo agitur, non consequatur, alias tamen utilitates esse certas.

Primum, quia Pontifex ipse in similibus rebus consideratior fiet, cum videat non deesse, qui audeant pro bono communi, esseque id magnum frænum summæ potestatis, cui facillime obrepit licentia.

Deinde alii etiam Cardinales ejusmodi exemplis animosiores fortioresque fiunt, ut sæpe in pugna, qui fugiebant, unius audacia, ac robore revocantur, viresque, & animum sumunt.

Denique si nihil aliud, Cardinalis quidem, qui hoc facit, officium suum facit: quod si deinde alii impediunt, ipse certe culpa vacat, qui sane est fructus conscientiaæ vel maximus.

Huc etiam pertinet illa Speculatoris parabola, de qua est apud Ezechielem, qui si gladium videns venientem, non insonuerit buccina, quidquid damni sequutum fuerit, de ejus manu requiritur. Sin autem ipse cecinerit buccina, sed quispiam negligentia sua, quia se non custodivit, perierit, sanguis ejus super ejus caput, Speculator autem innoxius manet. Sic enim omnino dicere possumus, Cardinales omnes quosdam esse Speculatores domui Israel datos, idest Sanctæ Ecclesiæ, in cujus arce positi sunt, ut provideant, atque etiam denuncient quibus oportet, atque in primis ipsi Pontifici, tum bona, quæ prodesse, tum mala, quæ obesse possent communi salutis.

Quare si id impigre, ac strenue, nulloque cuiusquam respectu fecerint, etiam si ab aliis non audiantur, saltem ipsi animam suam liberant. Sin vero tacuerint, aut dissimularint, non abibunt impune, quia in eo ipso delinquant, quod maxime ab ipsis exigitur.

